

Memperkasa tatakelola, integriti



Dalam usaha membina negara yang berjaya dan berdaya saing, aspek tatakelola serta integriti menjadi nadi utama tidak boleh dipandang remeh.

Perdana Menteri, Datuk Seri Anwar Ibrahim sering menekankan keberhasilan negara bukan hanya bergantung kepada kemajuan ekonomi semata-mata tetapi juga bagaimana tatakelola diurus dengan penuh integriti.

Naratif Malaysia Madani cukup jelas menegaskan bahawa integriti asas kepada kejayaan sesebuah negara. Namun, isu-isu rasuah melibatkan pihak berkuasa tempatan (PBT) sering mencemari usaha ke arah pembaharuan itu.

Baru-baru ini kita dikejutkan dengan penangkapan beberapa kakitangan Dewan Bandaraya Kuala Lumpur (DBKL) kerana terlibat amalan rasuah. Insiden yang merupakan sebuah rahsia terbuka itu menimbulkan keresahan rakyat, yang

mengharapkan pentadbiran bersih dan berintegriti tinggi.

Di Wilayah Persekutuan, Menteri di Jabatan Perdana Menteri (Wilayah Persekutuan), Dr Zaliha Mustafa telah memainkan peranan signifikan memastikan tiada ruang untuk potensi rasuah berlaku. Dengan pendekatan *zero tolerance* terhadap rasuah, beliau komited dan mengambil tindakan tegas memastikan setiap urusan pentadbiran dijalankan dengan telus serta adil.

Pelantikan Datuk Bandar Kuala Lumpur, Datuk Seri Maimunah Mohd Sharif juga dilihat sebagai satu langkah reformasi tatakelola sangat positif. Maimunah mempunyai latar belakang kukuh dalam bidang perancangan bandar dan pembangunan lestari, merupakan individu berpengalaman luas di peringkat antarabangsa.

Sebelum ini beliau pernah menjawat jawatan Pengarah Eksekutif UN-Habitat, sebuah agensi Pertubuhan Bangsa-Bangsa Bersatu (PBB) yang bertanggungjawab terhadap isu-isu perumahan dan pembangunan bandar.

Maimunah juga pernah menjadi Datuk Bandar Pulau Pinang. Sebelum itu beliau ialah Yang Dipertua Majlis Perbandaran Seberang Perai dari 2011 dan wanita pertama dilantik mengetuai

sesebuah kerajaan tempatan. Pelantikannya sebagai Datuk Bandar Kuala Lumpur membawa harapan besar bahawa Kuala Lumpur sedang diurus dengan lebih cekap dan berintegriti tinggi.

Kehadiran tiga wanita besi dalam pentadbiran Kuala Lumpur iaitu Dr Zaliha, Datuk Noridah Abdul Rahim yang merupakan Ketua Pengarah Jabatan Wilayah Persekutuan dan Maimunah adalah manifestasi jelas berkenaan usaha kerajaan memperkasa pentadbiran telus serta bertanggungjawab.

Tiga ikon wanita itu bukan sahaja cemerlang dalam bidang masing-masing tetapi juga membawa nilai integriti tinggi dalam pentadbiran mereka. Yang bagusnya, pemimpin wanita apabila bekerja, mereka tegas dan mengikut garis panduan ditetapkan.

Sebagai sebuah badan bukan kerajaan (NGO) yang memperjuangkan isu integriti, Pertubuhan Integriti dan Governan Malaysia (Malaysian Integrity and Governance Society) melihat pembinaan negara madani yang dibayangkan Perdana Menteri hanya akan tercapai apabila setiap lapisan masyarakat terutama dalam sektor awam dan pentadbiran menghayati prinsip integriti dalam setiap tindakan mereka.

Integriti bukan sekadar soal etika

tetapi adalah asas kepada pembentukan sebuah negara yang adil, saksama dan makmur. Reformasi yang sedang berlaku ini perlu diteruskan dengan sokongan padu semua pihak termasuk rakyat.

Mereka perlu memainkan peranan dalam memantau dan memastikan setiap urusan pentadbiran dijalankan dengan telus. Integriti adalah kunci yang memastikan segala dasar dan program dirancang dapat dilaksanakan dengan berkesan, seterusnya membentuk sebuah negara sejahtera serta berdaya saing di peringkat global.

Rakyat Kuala Lumpur layak mendapat sebuah bandar raya yang diurus dengan penuh integriti dan kami yakin dengan kepimpinan yang ada, DBKL akan menjadi contoh terbaik dalam aspek tatakelola, bukan sahaja di Malaysia, malah di peringkat antarabangsa.

Bersama-sama, kita mampu membina sebuah Kuala Lumpur yang bebas rasuah dan menjadi kebanggaan seluruh rakyat Malaysia, sekali gus menyumbang kepada kejayaan negara madani yang kita semua impikan.

** Datuk Seri Dr Akhbar Satar ialah Presiden Pertubuhan Integriti dan Governans Malaysia (MIG)*